



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU

### *Komunikadu Imprensa*

*Distritu Ainaro*

*08 Outobru 2014*

### **JSMP hala’o treinamentu iha Komunitade Suku Cassa**

Iha 03 Setembru 2014, Judicial System Monitoring Programme (JSMP), liuhosi unidade peskizador legal (LRU) fasilita treinamentu ba lider komunitária sira iha Suku Cassa, Sub-distritu Ainaro, Distritu Ainaro.

Partisipante ba treinamentu ne’e hamutuk ema nain 30 ne’ebé kompostu husi mane na’in 11 no feto na’in 19.

Treinamentu ne’e ho objetivu atu hasa’e kuiñesimentu autóridade komunitáriu no comunidade sira ne’ebé hela dok husi tribunál. Tanbá dala-barak comunidade sira infrenta krime oin-oin hanesan (violénsia domestika, omisidui, violénsia seksuál no krime ho natureza sira seluk) maibé sira la hatene oinsa atu lori prosesu ne’e tuir sistema justisa formal.

Materia treinamentu ne’ebé apresenta durante sesaun treinamentu ne’e kobre konseitu baziku kona-bá diretus umanus, kódigu penál, lei kontra violénsia doméstika, liu-liu provizaun relevantes sira ba tipu kazu krime sira ne’ebé maioria akontese iha sosiedade.

Aleinde ne’e diskuti mós kna’ar no responsabilidade autór judisiáriu hanesan juis, ministériu públiku, defensor públiku, advogadu privadu, polísia no oinsa atu asesu ba justisa formal wainhira sai nu’udar akuzadu ka sai hanesan vítima husi krime ruma.

“Atividade treinamentu ne’e hanesan atividade kontinuasaun hosi JSMP, hodi continua haklaken informasaun legal ba comunidade sira atraves hosi lider komunitária no joventude sira atu nune’é sira hotu bele iha koñesimentu ne’ebé suficiente kona-ba setór judisiáriu, nune’e sira bele prosesu sira nia kazu iha justisa formal”, dehan Diretór Ezekutivu JSMP, Luis de Oliveira Sampaio.

Materia hirak ne’e bele sai hanesan mata-dalan ba comunidade wainhira hasoru problema ruma iha sira nia suku laran no bele aplika ba sira nia moris loron-loron nu’udar sidadaun ne’ebé diak.

Xefe Suku Cassa, Distritu Ainaro, Sr. Aleixo de Carvalho Bianco iha sesaun abertura no enseramentu hato’o nia apresiasaun no agradesimentu ba aktividade treinamentu ne’e no husu comunidade sira atu akompañã didiak programa ne’e hodi bele kumprinde oinsa sistema justisa formal nia funsionamentu.

JSMP observa katak partisipante sira hatudu sira nia interese hodi partisipa masimu tebes atraves husi aprezena perguntas no hatoo sira nia esperensia rasik. Tanba ne'e, sira manifesta sira nia laran kontente no apresiasaun ba JSMP tanba bele organiza treinamentu no divulgasaun informasaun legál importante hirak ne'e ba sira nia suku. Partisipante husu pergunta hanesan wainhira sira infrenta krime ruma, oinsa bele prosesu krime ne'e liu husi dalan justisa formal.

Aktividade ne'e realiza tanba hetan apoiu orsamentu husi UNDEF (The United Nations Development Fund).

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795